

No. 418. 1467.

Ausmessung des Stadtgrabens.

Es hat der rath die wassergraben vmbe die statt gehende messen lassin, wie vil die an eckern haben, so hernach folget. Item der erste am sloßgraben anzuheben biß an die Thomaßbrocke hat eyen halbin acker. Item der andere hynder den Thomeßern eyen halben acker. Item der dritte von der Thomeßer gemach biß an den tham bey die vyhehofe eyen halben acker minus VI ruten. Item der virde von dem thamme biß an das Ransche thor virde halben acker. Item der funffte vom Ranstetischenthore biß hynder Unßir liben frauwen hat fünffthalben acker. Alßo behalten alle der statt wassergraben zcende halben acker wasßer.

Nach dem Rathsbuch fol. 22^b im Archiv des K. Bezirksgerichts zu Leipzig.

No. 419. 1468. 18. Juni.

Nickel und Katharina Schumann wenden dem Georgenhospital 4 Acker Wiesen bei Möckern zu.

Nickel Schuman vnde Katherina syn elich wip sint irschynnen vor dem siczenden rate vff sonnabent nach Corporis Christi LXVIII^o vnde haben aldo dem rate vffgelassen vier acker weßen hynder Möckeryn gelegin vnde haben die geeygent vnde gegeben nach irer beider tode zcu dem hospitall sante Jorgen, alßo zcuuornehmen, daß sie sollicher weßin die wyle sie beyde lyben vnde leben also biß her nutezen vnde gebruchen wollen, wenne sie abir beide todeshalbin vorfallen sint, so sollin solliche weßen bei dem hospital blybin vnde irer beider frund vnde erbin sollin doran nichts haben. Vnde der burgermeister hat die vfflassunge von in von des hospitals wegin vffgenommen vnde Nickel Schuman vnde Katherina syn elich wip haben die williclich vorlasßin.

Nach dem Rathsbuch fol. 34^b im Archiv des K. Bezirksgerichts zu Leipzig.

No. 420. 1468. 25. Juni.

Vertrag mit den Bewohnern der Neuen Strasse wegen Anlegung eines Steges.

Sabbato post Johannis baptistae LXVIII^o. Es sint vor drie rethe kommen vnd irschynnen die nackebuer gemeynlich uff der Nuwenstraße vsßewendig der stat vnde haben die rethe vleissich gebetin, in eyner pforten vnde stegk zcumachen. Haben die rethe angeseen ire bethe, daß die redelich ist vnde ouch die besßerunge, die dor vß den lütin an iren hüßern vnde erben entstehen mag vnde habin in zcu- gesaget, daß sie in eyns stegelß vorgunnen vnde machen lasßen wollin, also das sie eyen vlissig vffsehen haben, das die statgraben nicht vorslemmet addir mit vnflate